



素雯齋集卷之一

西吳吳伯與福生甫著

雲間董其昌玄宰甫選

賦部二首

燈市賦 有小序

今王正月燈會上元當年運之清夷藉

聖明之光飾其晴開甲甲輶九市而崩游冶之

百色也則若法雁吐珠神龍啣燭金標轉力

寶界迴新於時卿士約隊且觴且咏小人密



倚或鼓或歌予小子旣自公而多暇疇有政
而必聞乃邀好友減人從以漵逕弛冠裳而
擊袂談深佐酒夫亦極其致矣而山陰雲間
清人興寄各獻所儲响如也余唵而序之聊
取機於映賞因緣生而發悟蓋太平之樂事
無涯一瞬之新權易庀媿予官之淡淡當纏
微之睨睨滌滯慮於榮觀敢效陶歌將追歡
於良士并佐虞箴云爾

睽神都之寶勢承造天之玄居樹華闕於齡霄

鬱益蓋於層虛金臺值乎銀潢玉河睽乎歸墟
恍瑤宇與嵒嶙酌允鑠而樂胥祀皇德於周成
豈其鮮終而僅有初是日也氣膾葭瑄星正春
辰青陽衿乎冲和太皞棟其威神物孕寧而改
舊人逗機於若新冰將泮以微流氣無肅而有
仁 聖天子登三緯地乘六御天考月令之所
宜究休佑之所同第從臣之椒頌採太史之觀
風將以望杏瞻蒲敦耕勸農爾乃鳳蓋參麗象
輦霆較郎將鼓而虎戟交臚人匱而九賓重究

濟濟之皇儀展穆穆之帝容藩國要荒辨等以
入璧羔皮帛各獻其贄乃羨羣后於東除軼機
宜而問質曰萬物之爭揚春氣喜而自生倘民
黷之未捐何以稱陽節之淑清爰抗稜而布德
蒸霞液而賑籥荒束帛欲賁乎丘園諫鼓新開
於明堂民望如草而澤如春僂天道之皇皇於
是王心歡浹太牢斯饗春風風人其樂愉愉化
衍而流遐驚天區 天子乃肇年穀之豐登羣
有昏而偕樂開節假於黃扉引春光而駐脚時

則景星煜煜爰璨於澁焱風散鬢雲英間錯紫
磨素雯十色圍空天門呀然混沌欲鑿日黼黼
而上春臺筵窠窠而開油幕欲接通天之梯不
閉萎蕤之鑰鬪縷之香繚繞龍川之蠟方灼儼
翠筑之葱菁并蕙華兮交萼出珊瑚於鐵網間
隨侯以歷落想流珠於丹竈現莊嚴之瓔珞爍
乎若五金在鎔翔陽瀲灩而冲融皚乎若神漢
湧璣畜喬雲以芬靡晃乎若白榆嚶嚶而蕩銀
波駐芒穎之紛拏雪乎若僊掌巨靈之巖負闌

一
卷一
三
鯨璣而紛聚至如紫宮列宿環彩景彰虹霓迴
帶激日流光栽齒蓄於倚雲噴梨花於霞觴綴
碧紗之火棗舞星球於錦襜簫韶奏兮熬海繡
芾列兮蛾房蕙酒萬斛兮滴珠璣雪炮千丸兮
磨霓裳望觚稜之金爵起蓬萊於中央目眩轉
而欲迷依天表以洋洋若絕地之行難人顧影
而聳軀浮十步而一息拂埃壒而載驅各蹶跚
以結襪擬飛蝶之栩栩井里綴鐵橋而如織門
戶洸靈池於有無等風食於魚子走步帶於青

驢競作樂兮宣馬上有才情兮誰匿諸繞東華
之樂事頌堯堯於康衢乃其塲開九市貨別三
條闐城溢郭東西叫囂裂繒結綺拋彈飛鳶狄
鞮胡舞角觥絃幺器品則有哥窰秦籥周鼎商
彝瓦爵銀瓶金蟬玉貂書連於屋牀疊通闐驥
子魚文麟萃表標鉛錯銅錫麗於星賓幪琛幣
湧如潮熒隆隆之火井吐金景兮雲歆燒栢子
之銅爐織冰室之鮫綃青珠向風其欲乳瑪瑙
瑠日而轉驕騰酒車以斟酌齊宮商於雲翹豈

分豔於十三樓漫爭勝於二十四橋蓋如寶坊
之布金烘六合以爲窠爾其冠帶鱗起駢鞞憑
輶控寶鉸而纏金羈綴錦帶而懸吳鉤履躡兮
飛雲鳴佩兮琅球比懸璃之窈目類芙蓉之照
秋千唱萬隨從颺曼延于于喁喁與雲流連跋
躄魚貫櫛榻絲牽鶴蓋鸞吹眇若騰騫乃出金
而擲壁進舞市而御歌宮發皓齒於哇咬娛密
坐而搗鏞莫不羽鬣犀紕露紛練恰跣豸轉增
芬澤微發旣僂紹而便娟亂芳鬱於五風亦微
眺而連跣等金石之齧同躡蹠兮馳帶醉酣兮
曲終華燈錯兮鋒霄微投詩賦兮殷層空想夫
儒生授學樂列絳紗楚姝委潤舞歇章臺行行
閭閻洙泗步趨彭彭鏘鏘韓姑偕來和其光而
同其塵羣不黨而矜不爭庶幾似之其在斯哉
是以五宅夜游淡蕩諸峰之雪千炬圍燭流連
隔水之烟脂冷韓號空餘百樹花燈橋架廣陵
渺矣五雲仙樂曷若干官休沐萬井笙歌賜醑
樂豈接羽擲籥凌波之子續紛姑射之仙綽約

景得人而增妍人因景而欣躍亦何異乎榮露
騰軒蕭雲掩閣覲王母於崑墟要帝臺於宣嶽
實仙都之陸海文成五利之所不能托也然予
小子又聞摩竭陁國是夕佛現金頂座鬱峩峩
八十妙相八萬威儀赭如寶山光遍婆娑悅吐
妙音雍如鳴鳳花散優鉢果結菴羅摧伏狂飈
破除冥路鼓撞震方燈導恒河夫一燈披影萬
界霞標毛端國土原無差別燈能有見自不名
燈見元是性豈有生滅牟尼身自捧道場亦僞
設譬琉璃之籠眼根隨見而無缺是以人生有
涯苦樂無期隨寓皆客主者其誰愛流成海趨
而赴之過眼空華駟不及追彼夫水觀之棲結
蜃之市金人海藏未可殫窺清歡已矣良夜何
期主苟矚然而不緇客亦何傷乎隨寓而隨馳
倘其畔援而欣羨或難事而易悅將無始之趨
未超斯有終之相難閱吾將歸山河於大定悟
空明於一切九衢之草千計四照之花不折慧
日曜於重昏法雲蔭於火宅固靈境之常然豈

一夕之觀絕夫堅冰履霜尋木栽孽 聖天子
樂不及荒取戒蟋蟀故上下式燕且盤豈蟬鱗
之掘閱淨域非遙兮夏不知乎春色之所窮以
矢其音兮吾以觀乎中晏而彌烈 萬曆丙辰
上元

非非石賦

有小序

先輩米子仲詔嘗召余於畫舫石林間濯漑
燐亂無非石也其一石覆以華座窠以錯繡
想丹竈之玄珠恍靈海於嶷嶽恨不築清泠
之妙館闢石室爲崑墟矣米子又屬吳文中
貌以古紙繪以十面硜硜而庚庚直擾翰以
成林谷用力之妙勤乎一日驚怖其言過問
與曰吾聞昭文之鼓琴也師曠之枝策也惠
子之據梧也惟其好之也好之而欲以明之
則有愛成有愛成者虧於成吾其類是乎又
未知吾所謂之如莊周之在樂不在魚乎而
非也且也紛華盛麗穉穉焉窮智巧以岁人
如鳥獸禽魚者狡矣余歔歔乎取其沈物而

術之爲之母乃舍同趨異孤迂焉自遠於性也吾子以爲何如與應之曰若子所云將物儕其濃不必樸守人亦襍襍於同不必情之獨潔耶夫物之美者人爭毀而取之載其潔清惟石獨也南宮嗜石其意味人不能解余每謂嗜獨者能空心形至使眼如耳耳如鼻鼻如口無不自如無非妙趣舉凡可喜可怒之物都不開鑰以獻其中胸中蕩盪何如也况物我非兩歸於大通心知無二妙於神會

莊子之知魚樂是矣子何異焉於是米子顧予曰有是哉子盍爲我賦之與不能辭又畧於可言不可言之間乃作非非石賦

維土精與水沫盍五行而衍秀旣學學焉削劣亦堯堯焉髻辮練色以補其闕佐岳而潤乃褰恪秦梁而成漢柱剗書研而舂紙白雖得之紀載者未必盡然其氣之核而生也亦磊磊於宇宙乃若韞殼玉之餘輝作富貴之容光則玫瑰火齊偕昆吾而僕僕城功玄厲並砥硖而趨趨

王國靈龜井搖玉白梁相山鵲印錫金黃控搏
於青艫丹粟饜飫乎太乙餘糧斯可爲營豔之
端而未盡夫曠遠之致乃有學遊赤斧擬迹山
圖評帝臺之棋高仙嶺之博舍千日而不食當
一室以自娛庶幾乎開丹字於岱宗映蓮心於
天衢亦有談韻俊遠之士浴洗堅貞之輩獨巖
巖以自聳更落落其誰如覆宛委之玄文扣蜀
鼓之桐魚孫楚漱以勵齒嵇康見爲素書固風
格之雅幽而韻響之悞悞亦足以含月鏡峰逼

雲蓋嶺又何羨乎填海之貞抱天漢之綺䟽然
未有可几可案奕奕媒媒並書並史磻磻硠硠
移楊之隅芻蕘之隈窄峒而呈雲蕙風颺夫何
鴈序之以丈人而復標致之以衆中之王若天
行而星陳犛夔魑與獮狂披纓絡於寶座儼貌
相之矜莊纏聯於瀦溢玉膏差池乎茵蠢芝房
莫不垠塉振鱗緯笏給翻帥若閉陰磨若開陽
騰屹蟻虬流景引曜前後左右上下四旁如犀
沉而牛喚如狎馬而鞭羊如雁浮於平固如魚

躍於湘鄉如鎮方城於濮水如固天闕於金湯
如華陰崖之函蓋如湏彌額之螭腸如濟東之
相從而入海如棘城之自立而回翔如能言之
人鴻鸞譽譽如發響之磬應玉燿燿如永嘉之
星放明焉而轉宿於經天如負嶠之質虛燒之
而作雲雨新香如華山使者取以欵梓而受樹
中之書如秦帝東巡刻於大越而垂封禪之章
乃其虛中之理冥漠之觀如蠡測海又難比量
瀟灑綽約髣矣姑射之神翩翩袞舞尚乎雲霧
之裳其小枝之互相掩遜而蒼榮也屹嶠乎如
羣仙合掌十指十尖之森嚴其高峰之閱焉紛
披而歇歛也峯刺乎如大士現身千手千目之
開張其或遷或引或奮疊而軒髻或羅列而擁
帶如侃侃閭閻儼步趨於杏壇之上其半隱半
見半縉結而駉瞿半翕習而閃灼如姍姍灑灑
解佩環於洛水之傍驕炎處之而不加熱冰雪
催之而不加涼和不流而立不倚員中規而矩
中方審竅多比干之心豈骨等伯夷之剛投地

上之編爲王者師點道生之頭作證慈航噫嘻
乎殊形詭制未可殫論明不改供意可想存然
與又聞以指喻指之非指不若以非指喻指之
非指也以馬喻馬之非馬不若以非馬喻馬之
非馬也故曉喻物理須在物外乃明而取應環
中總歸無色無聲夫惟言之所不能論意之所
不能致乃至無之所自立至有之所從生如以
一滴投於巨壑一毛擬於太虛終不出乎域觀
而未離夫稱名謂啻爲石貌離指方能見月謂

啻非石貌木馬何以嘶風謂石現於啻輪斲豈
緣椎鑿謂石不現於啻道玄生烟霧於畫龍或
然或不然方是方非是何以呈焉而定乎其倪
止於其宗豈眉山之禪供佛印等之皆幻抑石
恪之維摩現筆端之神通鳳翔畫僧殘燈踽踽
焉欲動蕭氏扇頭咫尺而萬里爲重乃知舐墨
以微精和鉛而取機或粉本之在心或磅礪以
解衣形質空削尚有時泐之漸葉畫如工反流
雲母之輝描虛空其殆盡拔羣峰以欲飛謂同

玄而玄玄得非想而非非譬如泥牛之喘月孰
得而測其幾希想夫無狀之狀無象之象繩繩
難名惟道也夫蓋不減色以爲空不舍有以求
無惟恍惚而窈冥乃真精之與俱然則以此觀
爲正觀當是讐其神而遺其膚語云卽有得玄
斯啻庶幾乎何況主人吐經書於玄澹飲風露
之清神將萬象以冥觀和是非於天鈞精於玩
而非玩寄於僻而非僻孰窺其同出之門而測
其無住之因於是吳文中聞而默然仰而微笑

曰渠今正是我我今正是渠庖丁窺會妙湛恢
恢莊生夢蝶俄然遽遽付凡情於道真茲言或
其然歟乃強主人以肅客引前石而詰予曰密
若無言何不將擬議聲聞一切掀倒并杜口於
斯賦而共證乎清虛 萬曆丙辰長至

聊且園賦

自與游 座師李先生之門而竊幸其聞訓格
之言也真可鏤骨書紳染神薰識但欲從末由
者也蓋先生浴心方等之淵悟懷絕冥之肆故

乘權建議赭繩束枉豈不龍躡行空金鳩擘海
然虛而莫之礙也化而莫之圉也倘謂明月不
妄映蘭葩豈虛鮮乎固非若蠅朝蚊夕變聲成
市甚至爲尾旌角城也一日貽書雲中述其園
林之映受位置之鈿櫬凡夫熒熒乎烝雜薰以
實亭娒娒乎區修植以蔽域旣糝水土之精光
且托吾山而終志矣然陽動冰消耗不竭本舟
行水搖動不傷內真有會於逍遙之深旨者而
曰園中無一不有實無一取精得之心而寄之

園意不在園也故名其園曰聊且取適而止吾
弟適適者爲我賦之予惟以適得適失惟古之
懸解者物不能結而五根如箭意想如弓天下
足於所足者能幾乎余雖未身履其園已心嚮
其適矣欣言賦之以擬於大樹之樹廣漠逍遙
乎寢卧其下狹狹焉並游於不貸也云爾

猗斯園之偉構奠大石之名區逕靈氣於長春
鑄烟容於石間或樹古而室局亦宏邃而響虛
分爲區者各三路東西以縈紆縈栢寢於梧臺

收宿雨而變寒蕪每想梅溪桃源霖霏霞吐星
敷若夫遇真會真長橋虹渚交輸諒斯觀其渺
矣覺可以之亭不殊扁學圃而學稼笑電岩前
玉壺於是青綸碧組接新構之離婁禡薜荔於
當門嬖辛夷於修衢珊瑚林前檜松亦交唱乎
于于槩侯騷與蠡薺梅根蘭澤龍鬚泉井捲軸
兮膏玉蘋風貫響兮舞雩魚活活以淵潛鳥鶯
鶯而沸呼嵐彩飛瓊蕙麝湖目瑩波散珠石偃
仰於林間花四照而常舒廬落之果蔬自有版

扉之雞犬羣趨度羣喧之屏寂若出有而入無
主人忻萬象之昭晰蕩羣方之旭旭納陰陽而
吐心矯臺石而佇目殫今昔之玄思列經史以
連屋依稀乎移家室於真圖盟情期於濠濮然
猶題其名曰聊且寄於園而非園也蓋將曰儵
魚在水而忘於水故其樂以全莊周知魚而忘
於魚故知非有所假夫壘空大澤太倉一稊大
塊無垠孰可盡者目觀空華起滅境中爰有一
物無取無捨且彼臯壤與山林胡使人欣欣然

而悅豈亦其神不勝物或因而轉結勘人生之
去來似潮音之更迭忽東遊而西垂駒驟隙而
已瞥偶寄影於山川何煩聳聳而點綴叅聊且
之嘉名悟空明於一切語禰游戲三昧具眼裏
之筋言句總持見無骨之舌其在斯名乎與且
因而益廣其說與聞如來演法鹿園威儀具八
萬數顧能所覺所盡空乃現真寂真滅又聞莊
周空所有而逍遙狹狹足其所足無待亦不相
代奚人與虫之有別然則主人非適園耶無物
而非我安見外之可謝謝之是認周以爲非蝶
而我有專設然則主人非非適園耶無物而有
我安見內之可戀戀之是執蝶以爲非周而物
能我繼吾固知卽蝶爲周卽周無蝶昨夢今化
有何牽掣至適之適忘適天游不壅不歇日方
中而方睨越不見燕而燕不見越尺捶日取其
半萬世用之不竭信哉我之視園當如園之視
我彼無畔而此無援吾見其爲櫻寧爲朝徹想
至人吾吾慎慎付功名於亡何有之鄉粗事業

於順變無爲之轍所以曰無有亦無有不磷亦
不受涅而余之爲此賦也道堯舜於戴晉人之
前譬猶吹劍首之一吷
天啓辛酉

詩部

風雅二首

宜人之什

宜人唐頌也唐子爲司計大夫而客爲其母
節壽頌也

帝曰宜人有光於唐而以玉折孕此蘭芳賁爾
金檢乃佩瓊琚煥乎其文機杼之餘

章一

宜人曰

吁余昔以未死身顧此藐孤一顧一嗚咽匪子

之故未死胡爲乎

章二

立孤之難難於丈夫况婦

也隻外侮是虞湘澤中移兩曜不枯人亦有言

茹甘於荼三章濯濯冰腸啓丘軻藉母貞子廉源

清流潔門旌而高等硯山石四章猗歟宜人大夫

是儀恣哉大夫宜人是宜令尹賢母惟叔敖以

之霜娥彤管亦惟左史陳辭五章萱字長生髮照

翩翩有荃有蘭盈盈其前我有旨酒介爾百斯

年六章

宜人六章二章章四句三章章六句二章章

八句

賦得魏溥妻賦而比比姚母文也

睇彼離鸞霜飛玉抱我思古人母其杲杲一耳

血眼血滂流泉壤我思古人母也交相二機下

就讀房中就養我思古人母其雲抗三琴調既

移絲竹引痛我思古人母其楹棟四交結勝已

載用有嗣我思古人母其教兒五任生任死此

母此子我思古人母多受祉六

六章章四句

詩部

擬古樂府

五十六首

鏡歌五闕

丙辰秋刻於得勝堡市樓

凱則歌鏡此軍樂也丙辰夏卜素二首臨邊
講 貢雖若懷音而張饑吻督撫大臣及大
將軍治兵使者或垂竟壑之罟或弛天乙之
罟雉而媒之引之規裏徂而賦之時其喜怒
幾於弄丸手中繫骹講下以故二首扶服蛾
伏稽顙樹領黃龍玄菟之間紫駟汗珠騰驤

詩部

卷一

七

沛艾而入其種人他他藉藉讌酒食以意得
密如也于是大將軍王振宇治兵使者徐檀
燕偕予小子乘遺風出暗門涉王庭歷毳帳
絕漠三秋窮陰萬里暢感目之多顏歸一口
之所敵保障哉昔稱胡騎獵雲中者今何如
哉歸而彈箏擲籥倚瑟援笳真不減出塞入
塞之歌曲齊首高唱聲入雲霄而已酒半酣
夷婦倚靡而前著繡流紈折盤席下卽非燕
裙趙帶亦域外殊觀也飲九醞之甘醴揮千

鍾而不醒客賦醉言歸主稱露未晞斯時也
祇覺朔樓軒如王氣勃如維社維稷維此干
城煌煌如而總之曰 聖天子之威靈赫如
予小子引和其間聊以酌兌鑠而當樂胥乃
作鏡歌凡五闕

聖德巍巍不戰而威如日正景如電揚揮虜曰
漢治合天意願賜繒布甘酒食朱鷺翱翔黃雲
影長金羈垂光綫馬相將賡歌白狼獻 明王
與天相保永無疆

右朱鷺

漠南草具腓而絕塞塵飛翰海未飲馬陰山市
騎歸到處徵兵揚霜旗旗翻霧合陷重圍柳城
冒頓自歸依長坂呼韓早識機將帥何勞百戰
威胡沙一夕藹朝暉遠如期還故賞絲泉雖微
帝恩曠

右遠如期

秋光來登高臺宿霧山前抱陣回亂雲堆裏拂
旗開犬羊纍纍屏窮廬王庭旃幕任長驅銛鋒
不用數昆吾繫馬從今又識蒲願爲臣妾比荒
服摩頂呼天旅幣輸宴罷前致辭歸抱匹帛見
恩私永告種人 貢無後期飛狐嶺外天飲馬
城邊水漢使歲登臨勒燕寧勝此

右臨高臺

將進酒集朋僚修文廟堂策懷柔上相勞笙歌
吹入榆山下八簋具陳葡萄盡瀉啣杯馬向胡
兒跨夷婦席前宰夫炙酒氣催殘角聲啞淑旂
羽蓋迷燭夜翠雲縷弁纓鞅仰瞻玉容援北斗

好祝 明王千萬壽

右將進酒

雉子班集飛甸翅影麥花排勇戰麥秋誰使望
吾腹神風潛駭妖雲伏駱駝滿載羊滿目耕乎
牧乎歡郅屋卽言獻雉自夷荒那如五世拜輸
將麒麟來臻鳳凰翔將軍琴歌歌正長

右雉子班

君馬黃

君馬黃臣馬蒼高步影浮雲逸姿躡扶桑宣嶽
帝臺游崑墟王母觴金羈度紫陌鳴珂動康莊
但爲雍容步詭遇非所望不願峻坂窮駕八荒
鳴鸞而至其夜未央

芳樹

如霧千株發搖蕩到華池香浮非一葉色異且
千枝狂蜂輕欲掇弱鳥故低窺憶昔霜雪忽交
至旖旎歲蕤不可持欲召所思先折取好及容
顏正茂時

有所思

巫山未爲遠湘水非難測駕舟愁楫短驅馬愁
蹄仄人生等朝露百年如一刻軒皇經萬紀三
光自升陟空抽袖中絲漫向虛空織榮賤異平
生冢墓誰能識尼軻等幻化倩誰寄消息

門有車馬客行

門有車馬客顧盼藹餘姿有冠高切雲結玉組
絲絲藻自靈蛇握辨如飛兔馳問子何方來長
安久所羈揖翻鶴蓋陰從他寄日眉豚豕盡皆
肥季女轉斯饑我自急肝腸薄俗厚毛皮岬睨
蒼海間俠氣未能夷翻然念昔人楊朱迥自悲
井水亦或浮高墻亦可卑鷦鷯巢蚊睫鵬翼彌
天垂大小之所如吾安能知之

結客少年場行

浮雲映金絡明珠飾象弧步搖錦帶如飛鷲少
小遊遨遍五都篋裏黃金傾萬億酒中白刃重
添色吹簫擊筑動長虹不許尋常人半識七首
插腰鬪髀掛報取人間幾寬抑君不見拜爵論
功坐金山武安魏其徒沉默何如白首一布衣

頭顱擲客之爲得

長安有狹邪行

若華草風影移粉繩照入蘭膏枝入門賓從紛
相隨競趨一一盡恭卑明眸善睐美無度目挑
心與未知疲楊柳曲榴花卮博徒游俠千金貲
世人財利重頭顱散施只可陶朱知從來守一
未湏矜到此何煩泣路岐

戰城南

戰城南先怔營蠢爾夷酋方打城白草交旗影
黃河怒角聲雲昏匝日天漸垂鼓欲發爨未吹
颶驅山立虜爭馳哭聲震夫追妻父呼兒彌坑
血肉飽付鳶鷗招蒐無可招哀號盡死屍試問
主將知不知年命各在已主將不能持君不見
千金自來賣社稷從古忠臣未可爲

悲哉行

東風改朔氣流雲亂深陰松栢性干霄蔓草歡
相尋蕙蘭寧爲折蕭艾欣春林吁嗟生人世胡
不與世隨直道乃荆棘弱好是中逵八紘原自

廣東身細以絲與世既殊適行矣奚其宜明月
雖光照不入濁汗泥悲哉復悲哉輕言涕欲垂

秋胡行

燕好未三日固宜昧平生南金豈不重逢卿意
所輕去去五年誰待哺奉金何不先高堂目亂
朝華心馳路旁將泥比君情泥比君情芳引身
望沂水沂水白於霜清流無渾波明心空暗傷
妾不願金不死節但表思君別去腸

善哉行

昔人苦心餓采其薇儒迂墨儉吾將安歸一解抉
睛伍員捐脰要離所愁忠臣不可以爲二解務成
子光湛齋遺榮彼披裘子更韜其名三解牧老君
龍守劉安雞學仙果効讀書何迷四解越舟齊轅
向北更西酒不速瀝日影漸低五解懸腹鷓枝其
樂則那請入禪裏儂行曼歌

妾薄命

終風竟夜吼仰視天倉皇敗葉響啼虫枯井填
新霜桃花背向春風死楊柳未秋先自枯乘間

春秋遞爲賊等閑恩愛豈難渝少年姿想羅敷
雙波灩芙蓉珠香氣吹蘭蕙蘇念此雙蛾眉歲
月老相娛如何未稱老嗔喜轉相互未必心真
改新顏看已故只看庶草驕及彼花初樹長大
漸成圍過者不相顧提梭織竇錦錦織不成句
將髮織成衣衣成不敢付背燈拂鏡照鏡面是
妾面鏡背照君君影踈此生未擬真難見逝水
知東逝日西物極難云不終變

猛虎行

甲蟲蠹清世咆哮山與市幾欲絕人羣不數他
狼豕憶昔羸秦搏翼而食肉此也得無乃其族
我前往問之低頭復我辭萬物各有生膏血供
人饑且觀世人人相食一虎食人何足悲滿目
疥癬君莫憂蔓延瘡痂類如斯

京洛篇

欲識神仙宅芬芳楊紫陌暗浪起車輪喧聲動
衣鳥寶帳列三千囊金輕一擲槐成鶴蓋黃柳
帶纓垂碧亦有薄游人拜揖槐柳隙腰枝如束

薪登街顏色赤利刃屬他人習諛苦無策絲絲
罽眼沙遮盡摩天翮幾度悲腐草腐草時光澤
惻愴但含吁何如抱膝客居然恬貧賤不著長
安迹

釣竿篇

移家傍江海風波日以俱岸花低渡槳荷葉剪
爲襦釣竿何灘澁釣餌何羶腴大魚絕餌去小
魚爭奔趨豈其見貪心相戒於畏途我猶非鳩
鵲猶非鷺與鷓芬芳汝所棄垂竿余自娛寄言
彼此心胡爲相剪屠但引魚蠻醉漁翁任人呼

邯鄲才人嫁爲廝養卒婦

花趁朝光豔鳥作嚶聲和瓊枝一朝謝泥影空
摧挫喬木鳥不遷幽谷轉坎坷西施苧蘿女與
王同寢卧趙王有才人讌私不終荷墜雨已離
雲秋蒂當風播榮衰片刻間髣髴夢中過恩固
難爲篤孽豈由自作

明君詞

我貌原非惡君恩亦不輕只以無常見蛾眉誤

自傾黃金原得勢綠鬢不難更圖束披香殿榮
誇閼氏名貌豈可常恃身豈可苟生漢宮憶不
回畫師貨不成惟有陽春曲聊寄別來情

折楊柳行

漫雲蒸遠林平疇絲相續塗耕農事深枯槁勞
反復一解蚯蚓歌相引蒼蠅聽欲翻豈其元氣散
若輩競爲尊二解華光亦有竟鬱樹恒催落牛馬
可迭爲名譽空騰躍三解恣心古與今生計良不
拙去住各有適何用聲嘆切四解

從軍行

欲識征人苦親宴送行前陰山雲凍盡長城風
怒連鎧巧犀無色劔折鞘空懸柳絮仍寒甲榆
葉擬克錢妖營塵一望梯飛已蔽天騎驕如駛
雨城崩似亂泉白面羽林郎幾處哭重泉而胡
剗人肉盡以施烏鳶方爲舊人別又爲新鬼憐
薄身那得奮有淚還空咽

採蓮曲

並謂之江南弄

江花蕩碧水浮桂爲楫蘭作舟稚女盈盈駕五

湖珮珠輕曳裙風趨粉汗芳飄蘭麝膚其中白
鷺并鷓鴣逍遙圓水光相扶藕絲心想牽爲縷
無橋可駕水且迂風潮歸去日已晡蓮葉杯浮
影半孤

怨歌行

黃霧欲彌空羣雁亂行序白日忽西沉晴樹迷
汀渚人當屯塞時冤魄自齷齪高天而深淵媿
妍隔幾許一縑凡幾織新故更機杼手心遞健
陡機杼不能語浮沉勢各異思慮縈千緒此生
三萬六鎮日迷窮旅啼不必遡風而殿屎涕不
必注雨而惻楚肝膽不自制便如縛來鼠自非
莊周與蝴蝶胡能相與於無相與

烏夜啼

集題云夜聽妓賦得烏夜啼

如佩明星夜未低隨珠七采光映齊正持懷抱
從他盡烏認歡家且慢啼

其二

新花向暝傷烟明玉面要來傅粉情撥捩挑琴
初發響別有單棲高樹聲

子夜四時歌 四首

春歌 一首

新風臨錦花切莫吹落去百舌競晨鳴曳出同心語

夏歌 一首

蓮花水作光紅入金杯酒兩色摘來難携作珍簞偶

秋歌 一首

涼意帶風高蘭蕙香半徙但願芙蓉生霜雪無

輕毀

冬歌 一首

盡說井冰寒衾寢情偏熱歡負固世情儂未經愁絕

長門怨

玉殿眩新晴鸞鈴下錦城遙聞齊喝采添得暗消情花態分窓碎苔紋過錦明昭陽暮鴉色墮頭鸚鵡聲釵掩羅襦亂腰纖燭影橫無復他遺恨人錯說傾城

其二

凄其絺綌咏傷心絕代音閉夜歲蕤鎖遮簾豈
蕊陰夢疑呼喚慣粧護淚痕深忍笑題團扇嫌
人說抱衾文章未必貴買賦惜黃金

懊儂歌

約郎月出時接雞以達曙半夜烏亂啼恨殺窓
前樹

桃李千株舞歡腰耐早風忽持眠色去殘紅擲
與儂

前溪歌

垂絲白板船吹花結香餌前魚語後魚莫惜爲
儂死

輕盈水上風吹枯作紅紫不及八角帳繡出鴛
鴦嘴

折楊柳歌

權作千金贈只有黃金絲數盡贈行物寸心儂
自知

楊花當風軟故意從人墮說語負心兒轉身仍

作我

春風吹忽變霜月無留枝郎若不出戶駐卻好
鬚眉

江南曲

拍天春日浪無風不斷號舟輕楫仍小中流儂
自搖千歡將恨盡窺他兩度潮

百種百合花若耶驕一色家家學浣紗苧蘿驕
不得只有千金心儂知終不忒

紫荷舒桂檝藕絲趁鵝黃菱歌半隨風去來咽

復揚江南百般花撩人百念狂

釵光斜水影參差玉指柔折花將誰向儂自了
心頭不信西湖水風吹滑似油

邊城將

不信報恩人數盡世間寡養士同心肝雙虹顏
對頰射卻碧眼胡騎出大宛馬腹幹千人藏袖
血遍山灑且弗問開茅原因知我者

華蓋若飄雲爭識元戎幟不投霍冠軍不數李
公騎霞繡當胸盤金環搖執轡羞稱幕府功薄

施囊底智七尺命非輕輕於最初志

江南樂

舊蠶未乞種新條望采桑難將袖手坐遲郎製衣裳

擲卻芙蓉花來踏閭門草草色的然驕難道儂還好

妾似楊花眠忽作無風搖如驚態非一闕卻錢塘潮

趙瑟曲

素女絃調鸞語舒撥蔓纖指玉不如邯鄲裝成百媚工百媚工心難易萬恨除千歡積

巫山高

巫山高極天宮闕倍鮮妍日月翻銀海陰陽倏忽遷神女參差揚雙蛾倚靡翕呷影婆娑托君清夢流雲過玉床瑤枕香風和明耶晦耶竟如何精淫欲蕩枕中魔徘徊竟散雨翻河且問重期且暮麼淒風嫋嫋動樹頭霜露夜下狐兔愁淫荒未竟黃梁熟暮雨朝雲歸古丘

行路難二首

圖南鵬有翼見笑於其蜩西方聲自惡鳩勸東
徙梟出門各異路等之井蛙跳千言桃李變荆
棘坦坦天衢且叫囂山如黃金義如土恩讐變
易不終朝照地有時無白日安得逢人不妬嫉

其二

策馬上崑崙梯航到扶桑人生多志氣六鑿空
相攘山有虎兕水蛟龍欲往窮之焉能通何況
高行衆所忌往來好惡不得同且莫磷薄惡衰
賤紅顏青鬢漫勞羨恩愛湏臾苟一虧未有橫
天翼兩片把酒聊爲行路吟牽牛織女悲難見

秋閨曲

三星灼灼動秋輝美人翠袖怯霜威鳥歡同林
水同灣矧我同心隔幾山中堂出步鳴嬌環草
枯蜩語意殊頑輕絃迫手自遷延含粉流香但
涕漣安得明鏡駐花鈿

關山月

關山月青海影參差望到鳴機處盈盈動絳帷

機中秋風暮吹急剪刀燈下迫裁絺爲是霜衣
先寄取來夏新絺難後時如何雙鯉同衣去征
人裁信無還期搗衣明月自年年赤日易短月
難圓卻疑破鏡閨中照白骨紅顏憶各天

苦熱行

山蒸雲似火井竭烟自渾蚊攢蠅再集晝夜苦
囂喧侯家雲館朱砂牀桃李冰盤薦玉漿仙人
鶴苑自翩旋地脉星臺吐乳泉清涼我欲潛游
陟赤日何勞守甕天

銅雀妓

可似英威日樽開雜佩盈總帷疑斷曲松栢亂
棲聲亦知沒後戀生存歡怨平盛衰但有候身
往復何櫻

燕啣泥

楊花飛雙燕啣泥止畫闈徘徊欲向主人道哺
得雛成送雛歸雛歸不復依梁上羽翼且成憑
獨往但記啣泥相哺時母子腸中有飽饑吁嗟
乎丈夫乘時須念茲

梁甫吟

太山岵嶸欲摩天登封稱禪秘靈篇七十二君
名幾見何況謀臣蠻觸戰千金辭賞卻秦兵二
桃爭作齊門奠瀛洲方朔幾神仙流出塵埃凡
萬變如何徐生不回島博士坑殘自熬煎我吟
梁甫君試聽人生托世如流星抱膝居然長貧
賤此間卽是衛生經

苦寒行

欲閉看天地煩威到雪霜獸羣渺難索鳥羽沉
不揚而况羈棲者顧影未成行緬懷閨中婦玉
筋淡啼耕人生空失職徒羨雁隨陽

其二

公子開新宴朱樓御錦裘俠兒插雕韞驅馬西
山頭嗟彼車下人裋褐歌飯牛年命不在已安
能恣所由寒熱從來兩路深且看西山與東丘
易水行

風吹易水波如雨荆卿日暮從茲渡賓朋黯黯
淚不回壯士稜稜髮爲怒髑髏將軍輕自棄提

向秦廷血猶漬秦廷筭來七首中一擲浪焉等
兒戲何如擊筑燕市時歌泣相持死於醉性命
拚爲亡國謀枉作將軍髑髏累雖然人事成敗
何足論生死但惟義所視世間感恩良獨難知
已較之猶不易今人然諾竟如何面前嘖笑面
前戈俠氣久消太平日一去不還嗚荆軻吁嗟
乎荆軻已死易水逝至今英風向人揚其波

作蠶絲

楊花陣陣濃飛向女桑落攀花女兒心正及桑

莫莫

其二

戴勝聲和柔今年道蠶早懷絲貴及時愛早復
憂老

其三

菜花初擷子風簷繰新絲絲色雖爲素綺織成
於斯

其四

蠶繭飛爲蛾蛾成又生子取色耳目新絲絲皆

至理

伍山歌爲魏太史三世馳封作

伍山照佛光峰尖對鳳凰伍山照佛光峰尖對
鳳凰中有真人宅萬羽相迴翔詩書肇基行人
義漿沃根蘖栽局日扶桑歌以言之伍山照佛
光解一善豈近名歟不足以取餘善豈近名歟不
足以取餘鵬舉必息機雲龍潛作魚斗祿闔腰
改服樵漁貽所未盡曰有父書歌以言之善豈
近名歟解一雲膚霖稽天龍炬照醴泉雲膚霖稽

天龍炬照醴泉吉甫憲武文頌在六月篇感金
蟠螭賁於其先又等而上若有待焉歌以言之

雲膚霖稽天解一祖德述新詩斯文乃在茲祖德

述新詩斯文乃在茲汲冢發新藏檀左輝餘姿

周頌思文肇祀故宜流泓源湛葉茂根滋歌以

言之祖德述新詩解一孝經誦顯揚率親以率祖

考經誦顯揚率親以率祖當年過庭間歷世丹

綸譜崑崙九層芝田蕙圃永言者思世篤其祐

歌以言之孝經誦顯揚解一

折楊柳

三月飛楊花紫陌鬪繁華繡幌翻巢燕雕鞍起
睡鴉鴉啼和燕語片晌移春暮春暮詵杭州採
桑女夾路採桑復採蓮湖水濕衣襦牽人百丈
絲歌殘斷腸曲君心如女蘿香曳授情多妾貌
如奔帆老向三春過梅雨夏初綿含情託流波
竹枝詞
樹頭百鳥競深窠響發清流細雨過橋北橋西
聽欲似娟娟聲緩竹枝歌

其二

柳眼桃芽墻外吹翻他竹作踏歌詞青裙白袷
行沙岸語語香泥趁燕兒

素雯齋集卷之二

西吳吳伯與福生甫著

詩部

四言古體

寓懷

襄城小兒一語稱師貧而負策萬言胡爲侏儒
飽死東方則饑挾瑟嫖母幽閉夷施人無常邁
福致由誰以齊齊物齊亦成岐宥然忘言將無
庶幾聞之孔經空空如斯

其一

孫登適嘯屈平無聊務光洗耳相如題橋各徇
所好不能兩招歲有寒暑時榮時凋乾坤兆端
人胡不澆嗟儵與忽形神自天 其二

飛鵠行

飛鵠哀王氏婦也婦痛其夫之天越三月待

壙自縊呱呱弗顧也偶聞而唁之

睇彼黃鵠飛鳴提提一步一顧雙掛故枝 解一日

之頽也風鼓其厲宛頸獨宿鬼神飛逝 解一傍人

相寬強之視息維女有言死則可卽 解一凌虛失

翼涉川無津心之痒矣原土是親 解一生不忍獨

死豈忍孤寧忍於子豈忍於夫 解一結髮同衾黃

泉共友水不厭清緇川之阜 解一墓門有松枝葉

交通雙鵠重翔叩頭向風 解一向風而鳴曰反其

真太山鴻毛孰重孰輕 解一淄川奔城方之渺矣

彼弱男兒其鑒於此 解一

西山歌

朝上西山層陰不下怪石搏人重關難跨暮上
西山天青一罅載陰載陽奇逢其乍升雲圍圍

與日相迓山作蓮華月覆天瓦呼泉爲酒呼石
爲藉我嘯山傳轉相疑呀水落厨鳴杯流霞射
怪鳥戀枝各有匹亞鑿山作堂編籬成樹一漚
幾許儘容偏霸花迎佛笑席逢僧罵客語如綿
機鋒欲嫁喜怒性情孰真孰假黑白路頭互爲
叱咤玉泉白浮安得長借壺榼之下追我之暇

徐司寇六十

皇王紹熙世德祚融篤生山甫以保王躬持衡
藻鑑承景清風寧爲人妬不爲人工其瞻彼秦

山層巒峩峩梁父封禪孰揚其波我求明德濟

同以和不夸不毗受福不那其庸岷之傍弓矢

斯張方叔壯猷尚父鷹揚埋奴頓穎置慰開疆

其帝命曰咨八法攸屬仁且開網急非濕束所

仗者道所違者俗人亦有言直全枉曲其有印

如斗有髮如漆山中之相天民之逸處其玄根

廓焉抱一無用之用其用秩秩其秩維何君

子樂只膝饒青雲身傲黃綺腐鼠雖嚇鷓雛自

爾無求和俗而附衆美其澤雲易改溟渤可耕

道苟不遷毋問世情孔德豈衰參孝匪輕昔人
有言善無近名其南山有椿橫條貫天北山有
桂生而參焉鳳振其羽鶴棲其顛如蘭如玉錯
落其前其絳雲朝升陽谷吐靈啟彼玉扉曰惟
蔡經何以獻之青泥熟芝鍾山靈液照映金卮

其九

壽孔年伯七十

太華年
兄尊人

大哉吾師用行含藏敦彼高人而可獨當亦爲
委吏亦爲乘田春秋之筆寄之林泉逸矣淵明

賦歸去辭敦彼高人爲杜德機亦五男兒而工
筆紙伯兮仲兮中原鼎峙星辰著膝拄笏度雲
九溪之鱗五方之耘以無涯樂徇無窮道豈不
愛名吾從吾好世途蟻磨攢腥車馬呂稷謂真
箕穎謂假老彭服練蒙莊徜徉以彼兩慕何如
兩忘華陽洞裏玉簡光搖白日蒼龍玄言三茅
逍遙其中與天爲期再數十年我往從之和合
渾沌大家領取孰仙孰孔孰山中許

詩部

五言古體

題楊銀臺太夫人清節圖

楊閩人曾為都諫

北風一何烈黃雲蕩如馳念此芳園樹率爾萎
華滋淑人胡皎皎獨挺凌寒姿塵灰暗寶髻啼
含曉額歆寒燈瘦獨影零露澹長帷只有髮可
典買書或盈筍孤成名字立綺麗星辰垂引經
稱上意栢梁奏新詞匝地宮錦紫機絲照丹墀
俯視閩海流浩蕩陰陽移盛衰合有變亡沒無

還期獨此清冷音千載同一時

岷峨歌贈蕭太公八十 有小序

今天下必稱蜀材鶴呂蕭公其間值也太公
春秋八十高矣不有麟安有趾余喜而歌之
聊以佐兕

岷峨紀地德險峭青天平中有千章木蔽蔭帶
層城鸞鶴棲其顛仙靈時將迎至人秉微尚從
此結幽盟緒歌靜相聽畱夷佩其聲鹿市山頭
侶蛾眉雪色迎煌煌靈芝秀式瞻在國楨歌鳳
臨青鳥行驄擁吹笙抱日南床草常歡庭對情
老聃原柱史蒙莊固達生浮來鍾阜烟片片引
星精願錫皇家慶君子壽而寧

榮節詩爲呂民部題

長松振幽谷凍雲垂其陰隻鳥暮來集命儔結
遺音哀人易感傷聽之思彌深豈云獨輕死誓
不毀初心良日不可再秋風悲滯淫願爲素機
月願爲孤桐琴一絃一清照掌珠光對臨孤兒
與壽母酌酒深自斟燕飛初繫縷烏哺返啼林

汎汎舟爲栢誰謂天難謹

廻光寺卽事

空色原爲合卽有而得玄胡僧還著鬚艷婦特
叅禪朝來試明粧相期送佛錢粉痕腥昔雨翕
呷扇晴煙倚靡花下歸照影私自憐唾花花不
去誤唾兒郎前感郎千金顧約郎長橋邊身輕
新燕子心熱舊棲鴛棗門共展季見之且流連
榴火欲燒蝶蛛絲曳新綿孰以無情物而不相
糾纏但買傾城心應知續少年樂哉衆所共云

胡我不然

讀嚴之湯先生傳

東海蹈高士西山有餓夫貧愁終自見名利益
其愚今古竟誰托精神固不渝先生負奇骨老
去攻爲儒身隱心隨遠隣成德未孤生來愛膚
髮常若櫛株枸問字居成聚聽經客載途揮金
并鋤色市義可捐軀生計悲妻子深慈在友于
行已知何玷諸生愧也無有蘭當玉砌畱匣薄
青蚨道豈能攻達天終與善符固知明德後取

報定非誣

廣文先生馬澹齋陞北國博

文章揚與馬千古有遺則少小洛陽齒經國存
三策先生固兼之榮名與令德陳情一以疏子
職永無忒物好都不營青羶心所宅筆落春泉
青胸羅高雲白春泉聲轉靜高雲渺難摘以此
合大道消盡時人格予非學道人心神自穆結
不覺出愁鄉對酒每酣適

其二

道交固不易知遇亦有柄先生獨超詣勉身自
清冷一戢耀熠焚端然靜流競希夷澄道心妙
妍發真性而我狂簡資顧盼一以併市上曾過
騎園蔬展所敬光燈時吐輝瑩然出高咏念彼
躬矜者津途邈難淨結交豈必深氣類歸於正

其三

冬山淡欲睡玄水樓前津霜新月正吐敷涼欲
逼人我心殊鬱陶違此平生親大音豈唇齒意
匠謝芳塵筆墨布新景衣冠無等倫信我獨知

是嘉此道交申望望長安日此意更誰陳

仙燈洞

磴道掛層巖晴雲出深谷杳然世路迴愁絕心
與目有洞劃然開緣空駕短屋風過穴猶寒鳥
飛怯還覆丹芝明寶婺石乳滴晴瀑老僧擔笠
歸笑迎分半菽香蒸流霞鮮石煮茶共熟須臾
日將墮燈燈續林木撒水銀珠圓到地旃檀馥
千葉出蓮臺四照開天竺世界風輪攝劫火傳
灰速何日此山中菴羅結新築

徐宜人七十

同年徐思健之封宜人

我聞徐大夫矯矯破時格雖負循吏聲而多鷄
雞嚇漸鴻遯中林過影不留迹鳳飛中道單霜
曉啼粧額葉落寒機絲鸞匣丘軻籍碌碌誰家
婦盈盈金粟尺百年塵障業一半歸錢積華髮
豈迴根徒悲天地窄夫人雅事佛普度多利益
鵠不厭山高龍應生大澤旣挽鮑宣車食報徐
氏壁庭舞宮錦紅冰心頭與白年旣並松長名
亦照丹冊

霜降謁陵陪祀

日月一以麗萬古鴻濛闢真人御之行氣函山
與澤山山列羣僊是爲神龍宅土木被文綉楹
柱間明壁霜卉若迴光層層蹲獸石紫芝荐瓊
漿金燈導日夕颯颯松楸風霓旌明隧隙清廟
儼對越文德信無射君曰何以卜單厚而多益
小臣有進焉神鑒在民莫

其二

於鑠北平兵重昏慧日明王庭空絕幕奠鼎舊
燕城只今一杯土窄嶺薄太清佳城森以鬱帝
德浩難明八陵優僊官玉篋護六丁眷此含醇
者思慕如其生功誠首開創道亦在持盈蚪龍
當風舞颯矣長秋聲履霜因有戒怵惕倍含情

寄贈小二姪

貧賤與貴富如轉車中轂貧固士之常官豈藉
微祿但期厲高節不必書盡讀亦有讀書人干
戈森骨肉儒巾雖著頭桁楊如桎足才知昨日
非今日已難贖人具一手眼人具一機軸惟使

性情真急難肝腸熟我家小二姪或者不碌碌
春令時在原國事幾反覆當日寧捐脰今朝忍
枵腹人生但溫飽厚榮亦厚辱月有幾旬圓花
無百日馥千載清名在鬚眉終不俗

贈諸德祖南歸

擾擾操觚士各務徇所賞蛙蠅競相務鳴球焉
爲響之子戢時芳振馥吐神爽長康阿堵中顏
柳兼其兩及乎爲詩歌欲置先秦上猶然托冲
融不復干羣獎而我處不材中心當君往極目

西山色浮雲共惝怳顧影澱湖流珊瑚罾漁網
來往趁雙屐誰其困偃仰爲我掃機山從君學
畫掌雲陰冒柳絮何處發遙想

白五石大夢齋解

有序

余有口杜昆邪久亦鮮所言禪者正臥病杜
門客過而問曰有夢無夢孰是予曰且說有
夢有覺孰是客曰寤爲正寐爲夢夢暫而覺
久耳予曰然則何以夢時都有醒時了無夫
本無生也而妄見生滅所以名輪轉生死心

依於塵塵塵相授倏夢倏覺經謂非實有體
者是一性自往來寤寐都爲幻生滅二因離
是則常真實至人以生死兩大事總歸一夢
有以耳客相對嗒然因憶白爾亨曾以大夢
齋索題稍益之作大夢齋解

妙鬢西山雲靈颺日以舒虛中浮湛氣塵窖轉
居諸細人自擾擾達者幾蘧蘧晝僕夜爲君是
耶果非歟夢本覺之因覺卽夢之餘一性自往
來覺夢兩無居周與蝶孰分數車而無車猶如

衆空華終滅於空虛本自無生處生滅復何儲
一箇大混沌願君返其初是覺是大夢是儒是
真如有謂固非子無謂亦非余風止而浪靜前
渠卽後渠羅浮浮不去山凝水自除

送白爾亨奉使大梁便道歸里

一一世上懷誰作道情符心消緣宿迷氣洗莫
濡須我每對俗默流露幾追呼之子風義佳轉
覺神情輸琴尊倍予展亦曰調不孤有才匪刻
削精意等醍醐送君當夏末赤硃夏雲俱帷牽

荷蓋淨扇影稻風扶石高達摩洞珠明甃社湖
洞中佛祖印湖裏烟雲敷賦當梁苑就酒向海
門沽來往及芳緒不樂胡爲乎子宮亦淡淡有
筆幸未枯英雄任人占吾亦相與吾勸子隔春
來切莫矜大巫

王玉樞封翁六十

王心一年
兄尊人

雲出不須山海澄不見底所以市隱人迹混心
不翫翁昔吳都彥揮翰發新指豈無摩天翼空
嗟海鬪市於世雖不逢而固幸有子身當披華

繡心乃亢黃綺八仙社中飲一月一錯趾靈巖
映鬚眉秀水浴清齒只今上壽時珠璣照遙几
長安天子書青鳥啣來始予非能言者其言或
不靡衛武百歲箴要爲後日擬

中秋後三日送太史劉青岳同年給假歸
省

齊雲宛似絳風吹蕩華月十五照纔周俄然居
其缺躑躅生人間含悃向誰白之子臭蘭椒托
佩予所擇鸞姿謝雕績鵬翼恣遠適憶昔歲在

癸嘉馨挾東壁父書讀欲盡藜火照通夕吾代
幾攀龍濟南不復隻俯仰狎世觀中懷或我僻
勗我以高名矯矯先秦格稱引楊馬輩爲郎動
今昔顧影意相驅啣盃中自惜望去函山日飛
鳥依靈宅

其二

岱宗十八盤天門歷西東海日吐雞鳴池光觸
白龍中有五大夫其一劉太公太公挾飛僊化
乘窺鴻濛游踪一以駐綵筆舞班中騷陳激秋
霜辨演注湖風安得御雲氣我與故人同

送趙慕衡太史假歸

八荒馳驥足未向櫪中老絲桐發清響寧爲衆
人好彼美負奇氣青瑣幾淹倒春風揚其波辭
鋒出新藻仰視霞朝媚俯見洪厓島幽芬溢兩
頰履道在孤抱肺腑我交投衆人異所保襟開
延緒颺談深向晴昊別矣懷難盡秋月在前道
清巖白鹿洞夜光相與曜無景不會心尋源是
深造未必先達言榮名便爲寶

送曾通雲太史假歸

紅綻陰林樹吹入西風厲到市啼寒雀當城低
雲氣可憐驪馬塵飛作眼中泥數盡幾離亭別
我幾兄弟之子吐清姿高節期砥礪有胸必具
陳無微不共詣子曰嗟予父子曰養不逮予爲
風木歌子也賡嘆逝往復話如綿憫勞時相繼
與子若荆樹有葉或同蒂別子若寒鳥有翼當
風殢橫將半寸毫寫出消魂淚白巖山前雪還
山山不係蔡溪岩邊水誰去復誰滯結交豈面
親無語亦真契

劉半帆進士爲其長兄稱觴

中庭三荆樹欣聚且垂垂春膏方欲潤谷風兩
見吹而何根自傷葉葉互爲持此蒂交彼蒂大
枝蔭小枝大者若是壽小者中繩規比景共光
飾懷思在昔時嚶鳴灑酒處歌泣不成辭

朱咏白同年奉使南還時余方事郊廵口
占寄之

板使甘子冷小秋亦清秩世用更何如別是烟

霞質吹殘黍谷春望盡幽燕室不聞天子召但
得朋情密密只數人焉朱子固其一道恐古人
先情亦今人匹眉豎精華開襟披風雲出高談
每夜分得酒乃閣筆揮手一朝別星河時在膝
來也以何期念此春華疾

其二

虛中浮湛氣流塵自輪墮宿迷細人心清悟知
音和私懷旣宜展詩律自教作高梁橋上酒襍
就花枝臥輕薄汝無情迂僻予亦過時事漫歎
歎書蠹是工課人生無有涯世法空搖籤長卿
未爲傲賈誼才非大畱取蒼素姿寧作東方餓
我欲歸著書萬卷未能破春鶯巧惠聲之子當
一箇

歲暮送王非熊太史歸蜀

我憶威鳳山靈藥發遐想珠江流其光素雯布
清賞乾坤有真色大雅播爲響子雲旣龍舉用
脩遂霞朗庶幾于二賢誰當中心往之子及妙
年振馥吐神爽胸表青天行鬚眉白日上旣獵

六代言西京跨爲兩此道在世間識者心爲向
衆歡安足諧要與遠初亢策杖返峨眉所覩在
泱泱桐花鳥漸驕芙蓉溪漸長靜好對朋尊幽
懷與浮漾書架楊家滿搜訪歸玄匠論交必論
古乃稱時賢望不知春鷺聲可悉吳郎狀

送涂主爵給假歸里

蛟湖藻奇色蓮峰結暉英居心謝雕飾勉身事
潔清太液波方潤水鏡開其平乙鴻配六燕而
爲輕重衡胸表青霞爽鬚眉白日橫我幸居聯
屋君乃愜神情私懷許宣展時事或品評昔也
新相識今殊夙所盟節物正駘蕩乃作豫章行
江色過涼雨花態重盈盈芙蓉亂新沼深谷鳴
初鶯更聞簫曲鳥聲聲奏簫笙德音應不遠弱
心殊自明

送錢仲舉之清江浦

交托固有因攄懷在同咏悴我車馬姿虛微存
本性之子吐靈爽聞名意已并座上轉新聲斗
酒清相映千秋折鴻濛手挽天河鏡契我牙頰

間寤語兼奇正居然水部名去肅清河政波穿
少府錢雨挾流艘競人知急徵輸未信津途淨
君自湛襟期陽春轉機柄行矣我含辛眈眈筆
空勁飄蓋青楊端草色徵駒迸我欲乘秋歸一
爲理貧病其時淮酒熟衷懷托此竟

別長安

將出都門答友人惜別也

春風駕桃李獻態捲冰簾吹作茶甌韻如分香
與甜色味亦何常有無水中鹽人情真苦甘寄
托豈舌尖雷聲不鎮日龜談每無厭螻蛄及寒
蠶對晤如言餽宇宙喪元氣昆刀齒爲銛我友
德惜惜見之且欲箝但說男兒骨柔脆豈枯髯
卽如閱女貌只分濃與恬壺公壺中住天地側
身覘巨鱗躍斗水沫吐以自驗小大渾似此去
住在所占

其二

山鵲營樹顛枝壘何其固枝枝雖戈森閑雲不
肯住作意綴墻屏或擬鳩寄寓譬彼夸毗子行
行無卻步喧如蚊夜噴狎若亂魚鳧寸心自不

夷撇起羊腸路所以老氏言抱一以守素釋部
聽談經萬劫恒沙數色相歸生老繁華迭新故
芳時無常居官方隨所務開樽對我友要言但
兩句世人盡素心天地歸鎔鑄硯筆總不靈父
書讀亦誤但去勿復言證印及遲暮

其三

四月風猶號有鳥求其曹樹隱花如霧同枝若
異巢伊余事行役從此別同袍人生貴可談富
貴安足豪負載坤乾內俯仰類桔槔隻身能幾
何因緣重海潮胡爲魂魄拘而任耳聊聊服官
廣有人居心誰自超名實欲兼專風波轉眼挑
吾語汝至道蓋聞之參寥且觀世上權須是酒
杯操亦莫歌擊筑亦莫讀離騷江湖氣未死風
日信所遭魯連何以蹈海底無波濤牛馬可迭
爲但願顏髮牢

其四

侯生乃抱關宣尼亦委吏不知孰爲貴賤固隨
所值卽今棗下蠶脫繭飛蛾翅又如寒澗蘭迎

春香拂鼻時至物則改寧復殊受質且問貴泉
刀孰與貴志意苑枯若可測造化權何寄寥寥
神州局數着了亦易但恐古人先寧作今人棄
我有金與石從子結深義壯士荆卿髮引盡賓
朋淚成事固甚艱意氣亦橫厲纓濯必清流衆
種須高地慎勿落草莽皎皎男兒志

其五

五年長安塵棲習何擾擾世心終未熟韻語或
粗曉蠹魚漸漸成國恤復不小興至偶上書未

信帝閣藐波翻東海鯨舌亂倉庚鳥 天子不

罪已大將不心悄熱意快談兵算來陸贄少我
羨蚊睫上風雨不能撓如何青天渾似睡不得
瞭豈其中林且公侯腹心渺抑或銅柱勲未許
書生標人豈鹿豕乎棗弧事宜了小人偷自息
兒女柔情爨

山中雜詠

雨寂偶志所感

千壁繡烟霜稜稜自成折瘦極忽爲妍散處還
如結蒼突松樹紋陰薄奔泉咽炙日青草肥戎

戎覆土穴怪鳥作新知惠聲媚予拙以此互相
遭游者過喜悅變易生乎動人情競奇捷孰爲
平等級太山與丘垤

其二

頽嵐支石竇大半歸天匠人巧或間之移天置
盆盎石鑿自丁丁鋤雲作供帳豈不點蔥蒨豈
不美開創只恐石根破折盡仙圖樣試爲量虛
空可是無等量

其三

團團岩中木翠點當途布蕪蕪籬間花野草并
香注游人仰樹嗅一去不回顧靜女自紉蘭不
爲看花住美蔭何足庇脩潔雅自具笑彼鼻息
人及於美紈袴胡爲爲人引而以處其污魂魄
在所適聊從杯酒足吾意欣有歸春風澹相遇
出天門望山足水田

望處墟生烟青葉蠶子眠蠶已飛爲蛾女葉老
啼鶻隴畝正開鋤麻麥相勾連新香釀秧水雲
濕玻瓈天與山添景色鄉落草花邊

其二

湖烟染輕綠高山及小泚我來花正繁薄言櫛
菜子合族開舊畦一灣新水市布穀聲轉多農
夫相告喜眷言對華廡有懷托耒耜造化但隨
手努力而已矣

上天竺

依微窺下界攝入空明鏡風聽迴穴壯鳥怯層
飛影仰瞻真大士果在青霞嶺蓮出千枝燄花
開四照永躡影我欲隨老僧固以請照佛還照
面我曰皆清整欲悟紫金身只向衆生領

偶感却寄

幾年薊北人又着湖西屐東風送別時記向楊
柳陌芙蓉忽鮮新並蒂吐水石珠可作酒錢筒
可當琥珀以爾婉戀情從此翻歌拍色如朝雲
影心如明月魄吳娃兼越女芳潔誰得隻新鸞
雖轉林故燕終依宅爾有芙蓉鏡自照仍照客
鏡面照紅粧鏡背照冠幘游情客未低芳心爾
自惜但得容華好歌笑今猶昔蠹魚我空守美

酒我欲借湖西兩片水吹日照心白

臥佛寺

山邊石吐泉寺裏雲生圃我佛都不管合眼真
如瞽手不掛念珠脚不帶芒屨高天與下地伸
眉向誰語坐臥本循環何起亦何住坐時空大
夢臥去卽真寤欲識佛元身認取西洋樹山骨
老天衣石鱗濺雲乳面死毛爪靈是佛印心處

寺有西洋
樹合抱

華嚴寺西泉

寺門通暗泉泉脉山底寄捲如空翠皎凝若水
谷媚鱗鱗石子光桃花乳欲膩童子吹茶鑪未
熟茶先醉以此白耿耿雜引遊人至竅心點空
濛開闢豈無意

其二

紫霞橫不流白雪如欲織泡噓峰影亂苔餘石
骨淚我欲拾松陰點點澹相被亦欲移筆牀曲
向懸厓置如何設此想塵趨懶所嗜再爲自轉
語虛空本無位欲識未了心且看西來義

望湖亭

撥杖尋微泉逶迤山徑裏幾株無名樹團團自
相倚孤亭隱清流無言靜欲止泠泠舊草肥戎
戎覆石髓滴涓幾爲竭居然瓦溝爾何以名望
湖不見湖中水豈其入桃源竟作迷津矣空令
游者過魂夢先歡喜舉以語吾友虛名類如此

湖心亭

西山

武林湖心亭畫船當酒市紅旗射魚眼雲紋蕩
歌妓半醒半醉人各息蘇堤裏乃茲破椽亭斷
溝殘石耳移作龍潭邊豁眼待新水水山稱奇
敵武林或在此蘇公安在哉竟無新料理一面
發狂思一面自模擬吾足自可移何必移亭子
水移作酒池花移作女婢得趣便卽休無爲同
異視

靈巖山石歌

信足叩烟嵐怪石含班翠如井亦如雷如璫亦
如靛如猱亦如蟹如蛇亦如鷲一步一回想誰
其營位次將無鬼斧鑿然不天真累白波點萍

藻淡沼發新媚古松斜覆之風籟響清吹飛仙
恐難停雲流或深恣譬彼觀世音耳目千布置
不礙毛孔塵跳出聲聞地一佛一凡夫其中分
寤寐若以天眼觀石有叅天翅見石不見山此
是不二義

大石礪

歷陟到岩居遍償夙所嗜手攀花蘂岨玉女當
花至携將瑪瑙紅山山雲彩媚一石更天矯如
鳥驚雙翅兩序鳴球懸中堂珊瑚翠虛空無等
量筐篚有安置儼如攝袞袞沙彌排樹出竅雖
開混沌樸猶羲皇閔長揖門外別聖凡從此異

曝經石

我聞佛在時帝獻方廣石此石老玻璃天花紛
百尺芙蓉照夕紅明鏡吞波赤玄奘舍利尖鳩
摩蓮花擘我也滯凡身空身證佛位佛書讀幾
卷不讀其中字水去石無痕言忘卽了意到得
石點頭復何知見累儻恍聽鳴泉滴滴皆津液
畢竟沒字經是諸佛所示

送徐檀燕請告歸里

有小序

檀燕清識難尚至德可師雖藐予之寡識最
受賞於吐心醉語必誠寤言永矢兼窮公私
之致信關來去之因矣一旦慨世路之悠悠
傍時人而咄咄斯丘且樂吾山有懷則夫把
手而悲撫心而贈所謂賦蔓草於清揚寄霜
縑以游愬也他日或移足而見依庶幾信斯
言之可久

雪尚帶冬寒春如未肯至訴說煖陽和偏背寒
官意蘭葉不開香老梅難自膩山鬼嘯朝昏青
天渾此地渴欲吞居胥冷鄉餘猛志轉念齒牙
喧長安多怪事人人說憂天笑國若兒戲虜且
薄門庭相值猶相避我友格外言一呼醒羣睡
陋彼鼠藏人肝腸聊以示有筆但直書去就惟
所置獨我稱同心讀罷揮酸淚

其二

去年我見君楊柳拜雙袖今年君別我柳枝青
未透幾番風變態北來復南走牽衣欲問君無

乃太決驟君心向我寄我腸盡君剖石佛冰花
然市樓笳鼓奏譚深古與今情遠烟波瘦何以
多煩憂瞥然不念舊君前致我辭非敢戀頸脰
不見春時燕雙飛出簾晝僕僕秋相逢無能還
故宿載聽蝦蟆吠語語總成呪又聞桔槔聲農
事皆反復世局或亦然誰其補天漏吾生本自
浮出處天所授烈火燒虛空火盡空仍構俛首
繹君言君言真不謬是山可藏書余請從而後

陽和夜宿

未容弛宦網祝面老髭髯雲深疑閉室風勁自
舒簾廢鏹灰半撥涎熱等閒殲禪苦叅來謎詩
窮口欲籍茶勲荒凍艷水吐出香甜驅悶閑書
字呵毫破未尖每作思山夢苔烟如可粘山容
殊刻削憶比昆刀銛世間官長趣敷衍竟難恬
我本是書魚無沫吐自驗亦或類蚓竅瀉出小
言詹藏身但有酒塵勞且暫淹

辛酉雲中元旦

春王適履端御曆開萬載拜舞及雞鳴同官幾

千輩青陽扇條風景曜開陰晦樹色霽上林拱
揖非獻態長樂起鐘聲衆籟各相貸扈聖於紫
宸臣臣無隔閼豈其馭晴暉猶然各邊寒蠟焰
殘荒城冰垂市茫昧我倍有情懷無夢大庭內
墨髮欲去人不容我作對

送張玄洲歸泉山

有小序

某竊光飾於玄洲也蓋兩朞焉佩清源之無
盡屬道想於方來兼以愴世路之悠悠傍夷
荒而咄咄豈曰地臨易水作壯士相持之悲

或者咏擬碧雲切佳人遲暮之望耳

邊城二月雲吹陰作雨墜塵霾間腥風都與春
爲祟如張大地羅如鼓彌天翅士路不可行黑
暗還相類晴日作洪濤鑿空長根蒂好醜演當
場幻作魔天戲評品浪相抵蒙頭等猜謎惟彼
道心人浮雲無二視砥柱固以屬神理復綿至
但令胸臆舒豈作榮枯計姑射神人姿閑情彭
澤儷以茲適尊鱸將我肝腸係本是吳閩人恩
情等兄弟事君凡兩載發願相砥礪石佛雪夜

中携我入雲際雲西續新史置我藝文位于來
皇甫叙接引標竒致同調固所難相憐今不易
官能脫世網門常容問字文章不老藥伊呂亦
剩事是處是爲出脚底隨所值烈火燒虛空虛
空燒不碎我將一尺素寫此蘭旃意冰樹凍逢
人無春發嬌淚不瑣清源夢托思紫綃荔

月夜同客飲杏花下杏固徐檀燕移植也

作此憶之

雲中

自我來胡地春陰雪半垂有花成幽獨杏亦少

見之勤劬苦移植我友借幽姿芳心勞剪刻隔
年仍紛披有無香近客橫斜影弄枝入簾還伴
月作色故當巵雲中逼虜穴三春草未滋淒切
昭君墓青青未可期此花忽以放園林具威儀
頓令腥羶地幻出雪膚肌且吸杯中月月移花
亦移邊風卷地惡殘紅更傍誰虜酒雖難吞強
笑莫後時別後想花骨短夢空相隨誰人富天
巧寫出惜花辭畱連豈一物中情倍有思

接樹臺望雪

雲中

寒色動雲稜庭昏如相迫望入華夷山老頓添
新格烟樹無片青腥風播餘白米條光滿滿老
健真如石霧眼望成酸禿鬚堅作戟是官盡掩
門避雪如避客我相世間物濃冶都如炙過目
卽成幻濃冶豈久借清苦獨如斯欲擲不可擲
隨地相追隨寒官作莫逆惟有虜庭王見慣不
憐惜獨惜虜酒薄醉不煖胸膈

送張伯雍門人調官歸里

塞日不長白雪雲杳難霽以此割欣贈因之薄
身世少壯卽如人逶迤成暮歲旣涉伯王術亦
復輕時勢一骨由人賞寸心難自閉冰玉或其
姿米鹽苦爲計但聽吟詩喜時一猜禪謎生事
謝塵氛朋倫寬結契之子美年髮攬結固蘭蕙
民方得琴和人謂乖錦製胸且虹霓拂波將白
日蔽速貧向誰驕調官非我戾是非付兩行正
倒歸一切虛有人生夢原無世界蒂愛憎泰山
重成毀秋毫細祇此立命人能爲忍辱誓且看
碎虛空誰滅亦誰繫笑彼毒心腸徒成狂智慧

鶯鳩奚不適雞雍時爲帝身名固以悠歲月從
相遞惟茲失路情轉深別離際寥廓寄深心當
杯忽成涕大醉固所戒醉亦忘流滯會面復何
常百年心自締但行丈夫意何用憂危脆

將到恒嶽

恒山入來路舉步得奇詭突嶂破層雲峭林開
石髓嵌空巨靈手山木紛旖旎水時觸石怒石
或邀水止盤渦凡幾帶幽燠更十里冷薄地響
咽黯淡天光徙遠引星潮上近照暎霞裏鳥蹶

趨羅衣草根穿綦履南京燕子磯海上蛟入市
奇勝或兼之莽蒼真自喜祇愁雲物沉林陰號
蒼兕前代腥羶地我明欣有此居夷吾自嘆托
遊念茲始不見山頂狀已快山腰美鼎湖龍似
升丹竈烟如起天門路雖永得此已足矣

將到景州聞妖賊札營擄掠

山海今何若帝都賴以守兵將未可問壁壘不
改舊胸臆誰自決害氣國全受尤聞蜀黔間骨
壘將城厚山東詔未蘇鄒滕駢門嗾夏鎮尸若

魚河流判身首處處天爲阱天亦日熏臭嘆此
景州城作鎮京門右征調日且苦况復遭兵寇
豈其人事然生死或氣候我行適相逢東去復
西走環轍孔所失微服以免疚聖人無死地云
胡我獨繆但念中原人排戶入鬼宿聖德本無
失朝戰或反復賞罰豈其無鼎鬲終旁漏何得
悔禍天分出夜與晝遺來好土疆覷却廣宇宙
同心竟焉屬屯難何時究我情豈不微安得石
穿溜苦樂罄所遭鄙哉終食肉非告大夫哀聊

用相擊扣

南歸取道吳川范質公年兄延心揮酌窮
日夜之致畢回還之歡因以快此蘭期若
爲酬其谷受云爾

金天氣正清壬戌八月六間關向吳川拜君於
堂屋長跼未終揖欲言言半蓄且以定旭寒盤
筋紛相逐君才固秀上本性則真樸道刃日以
新冰稜轉自肅吐嗽如噴珠憂危等集木但及
籌邊策都非時人軸腐儒胡爲乎憂天空刺願

始知鍾鼎姿鄙食富貴肉握臂儘有人談心予
自夙北吳雅歌韻古盤清吟馥披之對疎燈永
夜動絲竹白月翻湖潮秋勝坐如沐提誨且勤
斯豈但情寄熟好鳥無遷枝幽鳴表深睦涼雲
返悠悠草蟲嘆時速前途但延盼弱腰安可鬻
事業不可爲明膽空盈掬以君局外心豁我區
中目去矣欲再陳我覲何時復

濠梁

鵬不笑二蟲蟲不羨風積蝶不知周夢周豈羨
蝶翅物我各有適忘適適乃至魚樂魚不知我
樂亦我寄樂如不在魚樂亦誰爲自樂如誠在
魚樂非我所使忘魚亦忘我是樂原無二但作
如是觀無住亦無歧周羨魚如此魚羨周不異
徒深羨魚者平空妄生企羨時風撼山羨後水
落地孔樂云在中浮雲等一視惠莊亦其人辯
駁了此義

游石佛寺

有序

刻碑雲中

石佛寺創自後魏拓拔氏時以定伯之猛力

作岡壁之清華接構歷七帝百餘年神峰遍
石佛二十座盤空數級梯石數盤似帆欲揚
如翅斯倚金人錯其虛臂葢宮蔚於高天竒
樹映樓閣以葱籠丹膏并異卉而冥密斷鰲
不足比其紛披操蛇不足喻其轉徙梵天化
城不足窮其高融奧博也方岳玄中張君命
酒其上樂我兄弟繚夕影之素氣朗風林之
竒氛於是雪熒熒而布天花月冉冉其出叢
樾虛白環身玄清滌慮恍矣接幽想於衆生

現空明於一切主人盡觥籌之摘發諸君極
本量之推排孰云靈境常然信是生人絕靚
予故欣言韻之聊以輸毫於大觀而溢齒於
清賞差爲飛慙云爾

是誰發幻想一鑿古光徧百仞入雕鏤虛空足
可踐皺秀而透瘦絲絲見佛面天神當頂垂寶
絡從雲絢或聚或紛披或立或飛濺或如覆釜
鏞或如脂塗線山山淨名身石石佛宅眷八百
金剛子盤盤作石串有時解點頭天風吹作霰

有時幻琉璃牟尼珠片片是雪是月光分火激
流電細酒沸真珠甕花添幽艷主人多布壘隨
蔭羅鮮饌醉裏語相忘無心不可見世事幾消
除鬢髮隨時變卽如瘦石骨霜雪幾陶煉彼哉
播餘羶何殊蠻觸戰人間塵土事一半寄纓弁
丈夫但乘時奚必端明殿有志不得申三公等
貧賤得酒但盆飲飲去少健羨一分可畱心或
在筆與硯願以雲林譜續作石佛傳

石佛寺回途中卽事

刻碑雲中

涼月浸寒冰新雪添晴耀彼白亦此白如以照
取照光明互相發虬枝寫層峭古寺欹瘦石寒
禽影相召禪燈老瓶水琉璃滑波掉世間濃冶
物過眼難相料清光當勝地混沌未開竅塵土
莫關腸好發淒清調歲暮催老曆顛毛雪多少
別去難致辭臨風但一笑

其時同遊者徐大叅檀燕王將軍振宇蓋萬
曆己未冬初也相毫釐而密移人倏忽其若
改每向左將軍楊太初溯流風而韻俱妙清

心其欲涉更念栢拔氏之霸力已燼億化身
之瑤光久畱凡在亡而必粗聖無存而不妙
倘予生其少逸會移家而作依以表家山是
用刻石

再禮觀音堂

已未冬仲偕大叅徐檀燕左將軍王振宇讓
席接雲嚼冰煮雪各極其致真不減蓮花眷
屬宛轉燈光用借袈裟隙地狂施捧喝一往
之境難返方寸之心若旋無何清觴甫停人

歡難旣徐王二公方渺予思而左將軍楊太
初以秀上之風期許予言之清越欲理石而
存之當拈花之暎受予是以遶禮三匝奉答
我大士圓成度脫無量功德云

亘天清涼臺橫海普陀石宗門卽欲界煩惱是
真宅無待有待間何見亦何得真往幻常畱鳥
過雲無迹不知活虛空從何着雙展

其二

色相故已空羨心從何設旣緣目境生亦緣目

境滅可見點頭時石亦成真訣實際本無窺虛
相終難結非石非佛間乃至無可說

獨坐對亭庵

但說青山淺靜覺青山深白雲天風吹布響出
高林乾坤孰是我歲月渾忘今松疑僧影至露
滴梵音沉了空寧有相機忘卽道心

詩部

六言古體

漁父

裊裊江村綠柳潏潏橋邊清瀏拋將長網成圍
駕去扁舟應手驚開飛鷺浮鷗跳入細鱗巨口
得意蕩槳歸來若箇爭先沽酒



